



Broj/Број: 01,2-50-1-127-20/04
Sarajevo/Сарајево: 20.09.2004.

ZAPISNIK

sa dvadesete sjednice Komisije za vanjske poslove

Sjednica je održana 17.09.2004.godine sa početkom u 10:00 sati.

Sjednici su prisustvovali sljedeći njeni članovi: Martin Raguž, Milorad Živković, Seada Palavrić, Izet Hadžić, Sead Avdić i Jelina Đurković.

Zbog službenog puta su bili odsutni Nenad Mišić i Vinko Zorić, a svoju odsutnost predsjedavajućem Komisije je najavila Azra Hadžiahmetović.

Sjednici je prisustvovao i pozvani novoimenovani ambasador BiH u Egiptu, Radomir Kosić.

Sjednicu je pratio savjetnik u kabinetu g.Raguža, Davorin Semenik.

Zapisnik je vodila Merdžana Iglica, sekretar Komisije.

Predsjedavajući Komisije, Martin Raguž, predložio je sljedeći

DNEVNI RED

1. Usvajanje zapisnika sa 19. sjednice Komisije za vanjske poslove Zastupničkog doma Parlamentarne skupštine BiH, održane 17.06.2004.godine;
2. Prijem novoimenovanih ambasadora/veleposlanika BiH u Španiji i Egiptu;
3. Delegiranje predstavnika iz Komisije za vanjske poslove Zastupničkog doma za Parlamentarnu ligu sa Japanom;
4. Posjeta dr. Wolfganga Schaublea, zastupnika u Parlamentu SR Njemačke i zamjenika predsjedavajućeg Frakcije CDU-CSU u Bundestagu i dogovor oko učešća članova Komisije u raspravu na okruglom stolu, 17.09.2004.godine u 16,30;
5. Posjeta predsjednika Parlamenta Kraljevine Norveške Jorgena Kosmoa BiH, 19.-21.09.2004;
6. Posjeta parlamentarne grupe Nacionalne skupštine Kuvajta BiH, 23.-28.09.2004.godine;
7. Posjeta gospodina Volkera Ruhea, predsjedavajućeg Komisije za vanjske poslove njemačkog Bundestaga, 14.10.2004. godine i dogovor za uzvratnu posjetu izaslanstva Komisije;
8. Posjeta predsjednika Komisije za vanjske poslove i odnose sa EU Zastupničkog doma Parlamenta Republike Italije, g. Gustava Selve Bosni i Hercegovini sredinom oktobra/listopada 2004.godine i dogovor za uzvratnu posjetu izaslanstva Komisije;
9. Posjeta izaslanstva Komisije za vanjske poslove Parlamentu Kraljevine Nizozemske-dogovor oko predloženog termina (septembar/rujan-oktobar/listopad);
10. Junsko/lipanjsko zasjedanje Parlamentarne skupštine Vijeća Evrope – dogovor oko stavljanja ove točke dnevnog reda na sjednicu Zastupničkog doma;
11. Izvješće o strukturi i stanju DK predstavništava/izaslanstava BiH u svijetu;
12. Izvješće o posjeti izaslanstva Komisije za vanjske poslove Srbiji i Crnoj Gori;
13. Izvješće izaslanstva Doma naroda o uzvratnoj posjeti Saveznom vijeću Parlamenta Republike Austrije;
14. Davanje suglasnosti za ratificiranje:
 - a) Sporazuma između Vijeća ministara Bosne i Hercegovine i Vlade SR Njemačke o finansijskoj suradnji za 2002.godinu;

- b) Konvencije o osnivanju Vijeća za carinsku suradnju (WCO);
- c) Deklaracije o antidopingu u sportu (WADA);
- d) Sporazuma o izmjenama Okvirnog sporazuma o slivu rijeke Save i Protokola o režimu plovidbe uz Okvirni sporazum.

15. Tekuća pitanja.

Ad.1. Razmatrajući predloženi Dnevni red, prvi zamjenik predsjedavajućeg Komisije, dr. Milorad Živković je dodatno kandidirao za raspravu Rezoluciju o zabrani slanja svih vojnih i policijskih formacija u misije u inozemstvo do donošenja odgovarajućeg Zakona i aktivnosti u ovoj oblasti koju je podnio zastupnik dr. Zlatko Lagumdžija. Uz određene rezerve pojedinih članova Komisije da može doći do preklapanja kompetencija, jer se o ovoj Rezoluciji treba izjasniti i Zajednička komisija za odbrambenu i sigurnosnu politiku i nadzor nad radom odbrambenih i sigurnosnih struktura na nivou BiH, te uz protivljenja pojedinih članova da se na raspravu o ovoj temi pozove podnositelj, zaključeno je da se ova Rezolucija stavi na dnevni red sljedeće sjednice Komisije i pozove njen podnositelj jer to samo može doprinijeti kvalitetu diskusije o kojoj članovi Komisije za vanjske poslove trebaju dati svoje mišljenje prije nego što Rezolucija bude prosljeđena Zastupničkom domu na razmatranje.

Također je zaključeno da je Izvještaj o strukturi i stanju DKP-ova BiH u svijetu još uvijek nepotpun jer govori samo o strukturi, ali ne i o stanju u predstavništvima, te da se ova tačka skine sa dnevnog reda današnje sjednice, a na sljedeću sjednicu pozove ministar vanjskih poslova BiH, g. Mladen Ivanić kako bi odgovorio na pitanja članova Komisije vezana za ovu temu.

Ovakav izmijenjeni Dnevni red je jednoglasno prihvaćen.

Ad.2. Zapisnik sa 19. sjednice Komisije za vanjske poslove Zastupničkog doma Parlamentarne skupštine BiH, održane 17.06.2004.godine, jednoglasno je usvojen.

Ad.3. Najavom iz Ministarstva vanjskih poslova BiH, bilo je predviđeno da se Komisiji predstave novoimenovani ambasadori BiH u Španiji i Egiptu. Međutim, zbog zdravstvenih problema koje je imao g. Josip Brkić, Komisiji se predstavio samo g. Radomir Kosić, novoimenovani ambasador BiH u Egiptu. Pozdravnu riječ je uputio predsjedavajući Komisije, g. Raguž, u kojoj je istakao da se nastavlja praksa tijesne suradnje sa predstavnicima BiH u svijetu, te da Komisija za vanjske poslove Zastupničkog doma Parlamentarne skupštine BiH ovakvim kontaktima slijedi prioritete vanjske politike Bosne i Hercegovine, a to su prije svega stabilnost i mir, suverenitet i teritorijalni integritet, potom politička, ekonomska, kulturna i svaka druga suradnja i izgradnja dobrosusjedskih odnosa kao i afirmacija BiH u svijetu. U tom smislu je uloga Komisije za vanjske poslove Zastupničkog doma Parlamentarne skupštine BiH u kreiranju vanjske politike i monitoring procesu njenog provođenja, od ključnog značaja kako bi BiH zauzela mjesto koje joj pripada u svjetskoj zajednici država.

Ambasador Kosić je, izražavajući čast i zadovoljstvo što se susreće sa članovima Komisije, najprije istakao da će osnovni cilj njegove misije u prijateljskoj zemlji Egiptu biti generalno unapređenje suradnje, ali posebno i inače dobre vanjsko-trgovinske suradnje između BiH i Egipta. Ta je suradnja oduvijek bila dobra između dvije zemlje, vanjsko-trgovinski bilans je 6:1, što znači 13 miliona dolara izvoza godišnje i 2 miliona dolara uvoza. Egipat je povoljno, ali dosta zahtjevno tržište, iako je fleksibilnije od onoga u zapadnim zemljama, a po tehničkom nivou i pristupu BiH je kompatibilnija toj zemlji na sjeveroistoku Afrike. Na diplomatsko-političkom planu, Egipat je sekularna, tradicionalno prijateljska zemlja Bosni i Hercegovini, a poznato je koliko veliku ulogu igra u regionu i veoma je aktivna u bliskoistočnom procesu. Amb. Kosić je članove Komisije također informirao da će nerezidentno iz Kaira pokrivati Sudan i Keniju, od kojih Sudan predstavlja jednu neugodnu situaciju za politička dešavanja u svijetu u narednim godinama zbog svojih unutarnjih sukoba i razmirica. No, po riječima amb.Kosića, tu postoji mogućnost da BiH Sudanu ponudi neka svoja iskustva i oblike suradnje proistakle iz teških ratnih i postratnih izazova. Kenija

predstavlja zemlju u razvoju sa značajnim resursima u kojoj se može postići više na vanjsko-trgovinskom planu.

Amb.Kosić je također upoznao članove Komisije da BiH ambasadu u Kairu čine 3 diplomate, i to ambasador, ministar-savjetnik i konzul te 2 lokalna uposlenika.

Zaželivši amb. Kosiću uspješan rad na novoj destinaciji, članovi Komisije su, u skladu sa dosadašnjim nastojanjem za intenziviranjem parlamentarnih kontakata sa nizom zemalja, uputili molbu da se u ambasadi u Egiptu poradi na unapređenju kontakata između dvaju parlamenata i njihovih vanjskopolitičkih odbora.

Ad.4. Na osnovu dopisa iz Ministarstva vanjskih poslova Bosne i Hercegovine u kojem je iznesen zahtjev da Parlamentarna skupština BiH delegira predstavnike u Parlamentarnu ligu prijateljstva sa Japanom, Komisija za vanjske poslove suglasila se da kandidira četiri člana Komisije u delegaciju Parlamentarne lige prijateljstva sa Japanom, i to:

1. **Martin Raguž**, predsjedavajući Komisije za vanjske poslove i predsjedavajući Zastupničkog doma Parlamentarne skupštine BiH;
2. **Milorad Živković**, prvi zamjenik predsjedavajućeg Komisije za vanjske poslove;
3. **Seada Palavrić**, drugi zamjenik predsjedavajućeg Komisije za vanjske poslove;
4. **Azra Hadžiahmetović**, član Komisije za vanjske poslove.

Ad.5. Razgovarajući o posjeti dr. Wolfganga Schaublea, zastupnika u Parlamentu SR Njemačke i zamjenika predsjedavajućeg Frakcije CDU-CSU u Bundestagu, Komisija se suglasila da u punom sastavu prisustvuje diskusiji/okruglom stolu o stanju u BiH 10 godina nakon Daytonu i pripremama za integracije u euro-atlantske strukture.

Ad.6. –Ad.10. Komisija se upozнала sa programom predstojećih posjeta Parlamenta Kraljevine Norveške, te parlamentarne grupe Nacionalne skupštine Kuvajta, kao i posjetama g. Volkera Ruhea, predsjedavajućeg Komisije za vanjske poslove njemačkog Bundestaga i predsjednika Komisije za vanjske poslove i odnose sa EU Zastupničkog doma Parlamenta Republike Italije, g. Gustava Selve Bosni i Hercegovini i Parlamentarnoj skupštini BiH. Također se usuglasila da je najpovoljniji termin za posjetu Komisije Parlamentu Kraljevine Nizozemske period od 18.-30.10.2004.godine. Nadalje su članovi Komisije, raspravljajući o međunarodnim aktivnostima u narednom periodu, zaključili da pozitivno odgovore na ponovljene usmene pozive Medžlisa Islamske Republike Iran za posjetu Komisije za vanjske poslove Zastupničkog doma Parlamentarne skupštine Bosne i Hercegovine ovoj prijateljskoj zemlji i njenom Parlamentu-Medžlisu te da se da se Komisija za vanjske poslove Zastupničkog doma Parlamentarne skupštine BiH u cilju jačanja međuparlamentarne suradnje sa zemljama Evropske unije u regionu, u narednom periodu želi sastati sa predstavnicima vanjskopolitičkog odbora Nacionalnog vijeća Parlamenta Austrije.

Ad.11. U diskusiji oko junskog/lipanskog zasjedanja Parlamentarne skupštine Vijeća Evrope, na čijem su se dnevnom redu našle i dvije Rezolucije vezane za Bosnu i Hercegovinu, predsjedavajući Komisije i član delegacije u PSVE, g. Raguž je najprije naglasio činjenicu da BiH na kvalitetan način koristi svoju poziciju članstva u Vijeću Evrope te da unutar svih struktura VE, kako Parlamentarne skupštine, tako i Komiteta ministara, postoji pozitivno raspoloženje prema BiH i velika želja i volja da joj se pomogne u ispunjavanju svih postprijemnih uvjeta i u njenom približavanju evro-atlantskim strukturama. U tome je najvažniji segment otvaranje dijaloga unutar struktura vlasti u BiH, prije svega Parlamentarne skupštine BiH, o tome gdje se nalazi BiH 10 godina nakon Daytonu. Zbog toga je uputio prijedlog da se ova tačka dnevnog reda nađe na nekoj od sljedećih sjednica Zastupničkog doma koje bi se trebale održati tokom oktobra. Dr. Živković je ukazao da je ovo tema koja bi trebala biti predmetom rasprave na plenarnoj sjednici oba doma Parlamentarne skupštine BiH, te da Martin Raguž, Seada Palavrić i Sead Avdić ispred Komisije za vanjske poslove Zastupničkog doma, zajedno sa predstavnicima iz Komisije za vanjsku i trgovinsku politiku Doma naroda, Zajedničke komisije za evropske integracije i delegacije u PSVE, pripreme prijedlog zaključaka o ovoj temi koji će biti raspravljani na plenarnoj sjednici. Dr. Sead Avdić je dao sugestiju da zbog izuzetno

ozbiljnog angažmana i rada delegacije PSBiH u PSVE, ova delegacija ubuduće u punom sastavu učestvuje u radu Parlamentarne skupštine Vijeća Evrope, kako na plenarnim zasjedanjima, tako i u radu Komiteta. Sa ovim su se članovi Komisije složili, uz napomenu da ova putovanja treba uplanirati u budžet predviđen za Parlamentarnu skupštinu BiH na početku svake godine.

Ad.12. U raspravi o Izvještaju o posjeti delegacije Komisije za vanjske poslove Srbiji i Crnoj Gori, predsjedavajući Komisije, g.Raguž je članove upoznao sa pozivom upućenim predsjedniku Skupštine Srbije i Crne Gore, prof.dr.Zoranu Šamiju da jesenas posjeti Bosnu i Hercegovinu i Parlamentarnu skupštinu BiH kako bi ova otvorena komunikacija među parlamentima još više doprinijela razvijanju bilateralnih odnosa koji su u usponu. Dr. Avdić je ukazao na činjenicu da je u svim susretima na najvišem nivou prilikom posjete Srbiji i Crnoj Gori izražena želja i interes da predstavnici parlamenta obje zemlje trebaju biti uključeni u rad Međudržavnog vijeća za suradnju između Bosne i Hercegovine i Srbije i Crne Gore i da je isti slučaj i sa Međudržavnim vijećem za suradnju između Bosne i Hercegovine i Republike Hrvatske. Zbog uvjerenja da će predstavnici zakonodavne vlasti na državnom nivou također dati značajan doprinos rješavanju međusobnih otvorenih i drugih pitanja između Srbije i Crne Gore s jedne i Republike Hrvatske s druge strane, članovi Komisije su se složili da se uputi dopis Predsjedništvu BiH sa molbom da u svoje buduće aktivnosti oko priprema sastanaka Međudržavnih vijeća uključe i predstavnike Parlamentarne skupštine Bosne i Hercegovine, tj. konkretnije, članove Komisije za vanjske poslove Zastupničkog doma.

Uz primjedbu dr. Živkovića da konstatacija iz Izvještaja o tome da pitanje suradnje sa Haškim tribunalom treba rješavati na Međunarodnom sudu pravde u Hagu nije stav cijele Komisije za vanjske poslove, Izvještaj o posjeti delegacije Komisije za vanjske poslove Zastupničkog doma Srbiji i Crnoj Gori je jednoglasno prihvaćen.

Ad.13. Izvještaj izaslanstva Doma naroda o uzvratnoj posjeti Saveznom vijeću Parlamenta Republike Austrije je jednoglasno prihvaćen.

Ad.14. Komisija za vanjske poslove je dala svoje mišljenje da su ispunjeni uvjeti da Zastupnički dom Parlamentarne skupštine BiH na svojoj 44. sjednici da suglasnost za ratificiranje sljedećih sporazuma i ugovora:

- a) Sporazuma između Vijeća ministara Bosne i Hercegovine i Vlade SR Njemačke o finansijskoj suradnji za 2002.godinu;
- b) Konvencije o osnivanju Vijeća za carinsku suradnju (WCO);
- c) Deklaracije o antidoping u sportu (WADA);
- d) Sporazuma o izmjenama Okvirnog sporazuma o slivu rijeke Save i Protokola o režimu plovidbe uz Okvirni sporazum.

Uz ovo, Komisija je predložila da se, kada se radi o izmjenama i dopunama sporazuma i ugovora, te eventualnim spornim dijelovima u tim dokumentima, na sjednice Komisije pozovu predlagači, tj. potpisnici sporazuma i ugovora kao bi članovi Komisije dobili neophodna pojašnjenja.

Sjednica je završena u 12:00 sati.

Zapisnik sačinila:
Merdžana Iglica, sekretar Komisije

Predsjedatelj Komisije
Martin Raguž s.r.